



**Ullunikkerup ullup affaa sulingiffiusalernissaa siunertaralugu Naalakkersuisut qulaajaanissaannik peqquneqarnissaannik Inatsisartut aaliangiiffigisassaattut siunnersuut. Qulaajaaneq periarfissanik assigiinngitsunik qanoq iliornikkut ullukinnerup ullup affaanik sulingiuulersinnaaneraniq qanorlu aningaasatigut kinguneqarsinnaaneraniq imaqaassaaq. Qulaajaaneq UPA 2025-mi saqqummiunneqassaaq.**

(Inatsisartunut ilaasortaq Peter Olsen, Inuit Ataqtigiit)

(Siullermeerneqarnera)

Qujanaq Inatsisartunut ilaasortamut Peter Olsenimut siunnersuuteqarneranut.

Demokraatit siunnersuut iluarinartippaat. Arlaleriarluta uparuartarsimavarput, sulingiffeqarnissagut freernissagullu ima aaqqissuussimagatsigit, Danmarkimi iliuuseq issuaannarlugulusooq.

Sooq meerartagut soorlu assersuutigalugu aavarfiup nalaani atuangiffeqarneq ajorpat, tamanna ileqqoq pitsaalluinnartoq meeqqatsinnut ingerlateqqinniarlugi?

Taassuma saniatigut freerfigut amerlanerpaat kristumiussusermut attuumassuteqarput. Tassani pivagut juullip ullui påskillu ullui kulturitsinnut inuunitsinnullu moderniusumut ilaalluinnalersimasut attatiinnarneqassasut. Kisiannili soorlu assersuutigalugu Tussiarfissuaq qanoq pingaaruteqartigaa, Danmarkimi atorunnaarsinneqartoq? Pinsep aappaa qanoq pingaaruteqartigaa?

Demokraatini isumaqarpugut, pissutissaalluortoq misissussallugu, sulingiffeqarnigut freerfigullu qanoq inississortarinerigut. Aammalu, allanngortittariaqarnerisut.

Tassunga atatillugu ammalluinnarpugut ullukinnerup ullormi affarmi ilivitsumilunniit sulingiffeqarfiulernissaa, isumaqanngilagulli, sulingiffeqartarnerit- aamma freerfiit amerlissasut, tamanna inuiaqatigiinnut akisoorujussuusammaat.

Taamatut oqaaseqarluta siunnersuut ataatsimiititaliami susassaartumi suliareqqinneqarnissaanut innersuupparput.